

Lizarra • Euskararen aste oparoa



Bihar, 'Euskara Estellerrian' izeneko erakusketa izanen da La Bota elkartean. Irudian, Korrika 12 Lizarrako karriketan barna. ● MIKEL SAIZ

LIZARRAKO EUSKARAREN AS-tearen kariatara Eriz magoa izanen da gaur Estellerriko euskaldunak biltzeko aitzakia. Umeen gozamenerako, Lizarrako kultur etxean ariko da 17:30etik aitzina mago gipuzkoarra.

Haatik, biharkoa izanen da euskaldunak eta euskaltzaleak biltzeko egun aproposena; izan ere, bihar ospatuko da bukatze-ar dagoen aste honen egun handia. Goiz-goizetik Euskara Estellerrian erakusketa paratuko da La Bota Elkartean, eta hauxe izanen da euskaldunen biltokia egun osoan zehar. Eguerdian herri-bazkaria egingen da, eta bazkalostean Trikizio taldea entzuteko aukera izanen dute bertan bildutakoek. Bazkarirako txartelak 12 euroren truke esku-ratzen ahal dira Katxetas eta Berri tabernetan, edo Beñat Etxepare euskaltegian.

Euskara Estellerrian erakusketan eskualdeko euskararen arrastoak biltzen dituzten dokumentuak eta materialak bilduko dira. Ildo horretan, mende hasierako liburuak eta agiriak jasoko dira, bertan euskararen presentzia nabaria izan zela irudikatzeko. Bertzeak bertze, Muskizko elizan emandako euskarazko sermoiak ikusten eta irakurtzen ahalko dira.

Lizarrako Euskara Batzordea arduratzen da urtez urte Euskararen Astea prestatzeaz. Bertan, Lizarrako elkarte, talde eragile, ikastola, eskola eta gizabanako euskaldunak biltzen dira aste oparoa eta emankorra egituratzeko xedearekin. «Gure asmoa euskarazko emanaldi kulturalak eskaintzea da, nolabait, euskaldunak eta euskaltzaleak biltzeko xedearekin», esan dio NAFARKARIAri Lizarrako Udaleko euskara teknikari Kiko Eskobarrek. «Halaber, adin guztietako

Bihar ospatuko den egunarekin amaituko da gaur zortzi abiatu zen Euskararen Astea

Musika, antzerkia, zinema, hitzaldiak... Orotariko emanaldiak izan dira aste honetan zehar ospatzen ari den Euskararen Astea. Gaur magia izanen da euskaldunak biltzeko aitzakia, eta bihar erakusketa, herri-bazkaria eta Trikizio taldea.

euskaldunei zuzendutako ekitaldiak prestatzen saiatzen gara. Ume koskorretatik hasi, gaztetxoak eta helduak goatzeko egitarau zabala prestatzen saiatzen gara, hain zuzen ere», gaineratu du.

Euskararen Egunaren bilakaera

80 urteko hamarkadan hasi omen ziren Lizarran euskarazko ekitaldiak antolatzen, orduko udalak euskara sustatzeko eman aurrekontuaz baliatuta. «Azken urte hauetan iraupen ezberdina izan du euskarazko jarduerak sustatzea xede duen ekimen honek», azaldu du Es-

kobarrek. «Batzuetan Euskararen Eguna egin izan da, bertzeetan hiru egunez, bertzeetan ostiraletan biltzen ziren ekitaldiak eta, azkenik, Euskararen Astea egitea lortu dugu». Egunotan egiten ari den asteak 3.000 euroko aurrekontua du, eta horietatik 2.000 euro Lizarrako Udalak eman ditu.

Iraupenaz gain, ekimen honen aldaketak izan ditu egutegian ere. Hasiera batean, San Joan egunaren bezperan antolatzen ziren ekitaldiak. Sua, zantzarra, afaria, musika... Hala ere, sutea prestatzeko egon arazoan ostean, datak aldatzeko erabakia hartu zen; izan ere,

haurrak dagoeneko oporretan zeuden, eta gazteak azterketa garaian. Beraz, aurreratu egin zen egutegian Euskararen Astea.

2002. urteko Euskararen Astea gaur zortzi abiatu zen Ruper Ordorikak eman kontzertuarekin. Astelehenean Xabier Mendigurenek *Euskara eta globalizazioa* hitzaldia eman zuen. Asteartean, aldiz, zinemaz goatzeko aukera izan zuten txikienek *Chicken Run* filmarekin, eta atzo Gilkitxaro Antzerki Taldeak *Trokaolatarrak* lana taularatu zuen.

→ Kristina Berasain



ur dai
are n
mintzoa


Xabier Larraburu

Katuen erlijioa

Katuen erlijioak ez die Jaungoiko batean sinestea eskatzen, baina bai zaratarik egin gabe pasilloan gora eta behera ibiltzea eta txolarre baten txilioa entzun orduko belarriak tente jartzea, eta ea balkoiaren atea zabalik dagoen begiratzea (badaezpadaere) eta, beste batzuetan, besterik gabe begiak handitu eta beltzte (hutsari begira) espiritu bat gelatik pasatzen ariko balitz bezala.

Katuen erlijioak ez du giza haragizko jainkoetan sinesten eta, hortaz, ez dute Fermin Deunean sinesten ere. (Are gehiago: Jaiaren fanfarreek entzun orduko ohearen azpira doaz segituan beraien ezadostasuna nabarmenki azalduz). Katuek zuhaitzetan sinesten dute (txoriak beraien fruituak direla sinetsiak daude), eta bereziki hor nonbait (mundu zabalean) dagoen Zuhaitz Sakratu batean sinesten dute. Zuhaitza arrunta eta ezezaguna ei da (anonimoa) eta berrehun urtez bizi omen da, gerora hil eta ondotik beste zuhaitz arrunt baten moldean (beste nonbaiten) birjaiozteko.

Eskola bateko katuek zuhaitz hori beti zumarra dela diote, bestetuek haritza dela beti, bestetuek mundua mundu denetik pagoa izan dela, bestetuek berpizkunde bakoitzean zuhaitz klasea aldatzen dela diote. Katuen artean mistikoenek zuhaitz anonimo honen bila atera eta zuhaitzetara igotzen dira. Gero, askotan, suhiltzaileak deitu behar dira mistikoen artean mistiko horiek lurreratzeko. (Suhiltzaileak ez dauden lurraldeetan, doike, katuen hezurdura osoak ikusten ahal dira zuhaitzetako adarretan). Katuen erlijioak eltxo txikiaren ibilerak zaindu behar direla eskatzen du, baina ez du, askotan horrela uste dugun arren, eltxoa akatzera behartzen. Katuen erlijioak, bizitzan zehar prezeptu hauek betetz gero, hil ondorengo berrogei sardina agintzen ditu (bakoitzeko) paradisu. (Zuhaitzaren gainaldean hilez gero ehun izango dira). Katuen erlijioak ez du misterio gehiagorik. ●



NAFARROAKO EZKERRAREN I.TOPAKETAK

BESTE NAFARROA
POSIBLE DA

Apirilak 20 goizeko 9,30-etan
Golem zinematokian
IRUÑA

batasuna

NAFARROAREKIN
KONPRIMISOA

